



NA BRANCÀ DE AUGURI

Strenzo
co le man de l'anema
el tremare
de l'ultima rosa de l'orto,
el respiro de l'erba inbrosemà,
el cio-cio de on petaréo
in serca de na frégola.
Strenzo
el canto del vento,
el celeste de on fior de radecio
spanio in fondo al campo,
el rumor de l'aqua ciara
che serca la sen del core.
Verzo le man
e me cato co
na branca de amore
da spranpanare intorno
disendo pianeto:
Bon Nadàe.

Gemma Bellotto (Cortelà di Vo'-PD)

SPETANDO EL NADAL

Drento un caltin l'avèa sconto:
el presepio adesso l'è pronto,
le stele su la carta disegnà
za le scumizia a slusegar.
I angioleti, in bilico da la capana
i speta infredolii el "do"
par intonar con l'Aleluja, la nina-nana
Anca i pastor coleghè
fra el s-ciapo de pegorine agità,
i sente aria de novità.

Maria e Giuseppe... i speta!
L'è mezanote!

Verzo el caltin e, pian pian
cuno el Butin, lassàndolo postà
al cor de la mama e el papà.

L'è un s-ciantiso de luce,
un regal de pace.

Maria Teresa Masini (Bovolone-VR)

'N ÀLBARO SPECIALE

Voria che 'st'ano, par Nadal, in piassa
ghe fusse 'n àlbaro piassé grandò e belo,
che a boca verta restar te fassa,
con rami longhi a tocar el celo.

Ghe metaria in punta 'na gran stéla
che fassa luce fin a l'orizzonte,
co 'na coa così longa e bela
che unissa tuto el mondo come 'n ponte.

Ghe tacaria ghirlande de speransa
parché finalmente su la tera
fra tanti mali, che ghe n'è bastansa,
no' fiorissa più gnanca 'na guera.

Fra 'n ramo e l'altro nastri de carezze,
de sogni fati anca a oci verti,
su come de 'sto mondo le belesse
fassa rinàssar ricordi ormai coèrti.

Càpole fate col ridar de i butini,
co i basi de le mame e de i papà,
e tante file de bei cioccolatini
de amor e pace ben incartà.

El saria proprio 'n àlbaro speciale,
ma, anca par 'st'ano, tacà ghè solo...
bale!

Gabriella Garonzi (Verona)

XE QUA NADALE

So na pocia de aqua
là par tera
se specia e se sparpana
el slusore de na stela.
Ghin brinco sù on pugneto
e cato par magia
i sogni mii de on tempo
che na nuvola, zugando
la gaveva incovercià.
I ga rento el calor
de la teneressa
e mi, uno a la volta
a vói farli zolare
sbiansando, dapartuto
co 'e semense de 'a Speransa.
Vardè, stanote, el celo:
"XE QUA NADALE"!

Ines Scarparolo (Vicenza)

COCÀI A NADAL

Dal ponte Novo, l'Adese guardo zo:
cocài che zàola al nàssare del sol

ci-ci-ci... ci-ci-ci...

i gode on mondo, le zate sul giarin
a pelo d'aqua becar calche moschin

ciù-ciù-ciù... ciù-ciù-ciù...

tuto d'on trato riva on segnale,
i scapa in alto, sbatendo le ale

ciò-ciò-ciò... ciò-ciò-ciò...

i sgola via par rivar fin da Tì
vizzin al to regno, Gesù Banbin

cià-cià-cià... cià-cià-cià...

a metà strada, tra la tera e 'l celo
a far co' i Angeli l'inchin pi belo.

Cè-cè-cè... cè-cè-cè...

Lucia Beltrame Menini (Verona)

QUANTE VIGILIE?

On ciufò de cavéi
ghe sfrisava el naso,
i déi ghe vigneva fora
da le sòcole,
i lavri gavéa ciapà
de le viole el colore,
e faseva làgrime i so oci.
Là, davanti a na vetrina,
so le rime de 'n'antica canson
la gente se fermava,
ne la so man slongà,
i me pensieri
perso i se gaveva.
Note de la Vigilia!
Gavaria vossudo fare
de i so pie reliquia,
scaldarli fra nuvole
da le stele indorà,
caressarghe le so ale de vero,
posarle ne la finestra del celo.
Ma el silensio xe un rumor
che siga a vodo,
rancurando i me ricordi
son 'ndà via, son scapà pensando:
"Quante Vigilie ghe sarà cussi
pa' i putèi dismentegà dal mondo?"

Maria Penello (Vicenza)

ORO INCENSO E MIRA

Signore, mi no vegno da l'Oriente
come i Magi, portando de i tesori,
ma vegno pa' adorarTe come lori
anca se i me regali no val gnente.

La mira che Te porto ga el profumo
che ghea 'l Nadale de 'a me verde età
l'amarò del tempo consumà
in robe che se sperde come fumo.

Sto scartosseto de oro che go in gaja
i xe i talenti che dovèa dar fruto,
mi, distrata, go perso quasi tuto
scanbiando l'oro al presso de la paja.

Ma l'incenso, Signore, almanco quello,
lo go tegnù par Ti, par Ti soltanto
stanote ghin vojo brusar tanto
da inpienar de profumo tera e celo.

Starò in zenocio drento a la capana
confusa in meso a tuta l'altra gente
par dirte grassie, grassie solamente
e cantare co i Angeli l'Osana.

Leda Ceresara Rossi (Sarcedo-VI)

XE NADÀE...

Sentiminti che prega
so mominti de fede
in chel'arfio de vento
che, co' gioia sentia
a Nadàe se respira.
Tènarò e caressévoe, par le vie
va 'l cantar de lodi, de nenie,
che fa bèò 'l sognar de la jente
spetando el Messia promesso,
e fa santa chea note de "Avento".
Anca i pasturi, guidà da na stela
inzenocià davanti la grotta
adorà ga Gesù Banbinèò.
Godémose 'lora chel sorriso pi caro,
na caressa lesiera
de chei dentini che ride
co i oci de l'amore.
Lì, fra na brancà de pajà
in te on mondo poarèto
Gesù Salvatore
dava luse al presepio
fasendo del Nadàe
la festa pi granda del mondo.

Gianni Fioretto (Isola Vicentina-VI)

C A M È I

I é tre Magi e a li portemo
pian pianelo
fin ca 'ndemo al gran slusore
dove sta Nostro Signore.

Da le dune del deserto
rotolando
vento forte spinze sabia e garavane
forma altane.

Caminando giorno e note
fadigando
su le rote de camèi e beduini
graspe e spini.

Procession de gran viandanti
silensiosi
porta vanti oro, sogni e grato omaggio
lungo el viaggio.

Romano Beltramini (Adria-RO)